

REGLUGERÐ um stuðning í nautgriparækt.

I. kafli

Almenn ákvæði

1. gr.

Gildissvið

Reglugerð þessi gildir um stuðningsgreiðslur í nautgriparækt, svo sem greiðslur út á greiðslumark, greiðslur fyrir innvegna mjólk, gripagreiðslur, greiðslur til framleiðenda nautakjöts og fjárfestingastuðning, samkvæmt samningi um starfsskilyrði nautgriparæktar dags. 19. febrúar 2016.

2. gr.

Orðskýringar

Í reglugerð þessari hafa eftirtalin orð þá merkingu sem hér segir:

1. **Árskýr:** Meðalfjöldi einstaklingsmerktra kúa á lögbýli yfir 12 mánaða tímabil samkvæmt skráningu í Huppu. Til að teljast með þurfa kýrnar að borið kálfi að minnsta kosti annað hvert ár samkvæmt upplýsingum úr Huppu.
2. **Bústofn:** Vefforrit Matvælastofnunar til að halda utan um dýraeftirlit og forðagæslu í samræmi við lög um búfjárhald nr. 38/2013.
3. **Gripagreiðsla:** Fjárhagslegur stuðningur ríkisins til þeirra eigenda einstaklingsmerktra árskúa á lögbýlum sem uppfylla skilyrði þessarar reglugerðar.
4. **Huppa:** Tölvukerfi og gagnagrunnur í eigu Bændasamtaka Íslands, sem heldur utan um afurðaskýrsluhald í nautgriparækt. Gögn sem verða til vegna skylduskráninga í samræmi við reglugerð þessa eru í umsjón og á ábyrgð MAST.
5. **MARK:** Miðlægur gagnagrunnur Matvælastofnunar þar sem varðveittar eru upplýsingar um einstaklingsmerkingar búfjár samkvæmt reglugerð nr. 916/2012 um merkingar búfjár.
6. **Nýliði:** Einstaklingur á aldrinum 20–40 ára sem er að fjárfesta í búrekstri eða hlut í búrekstri í fyrsta skipti eða lögaðili þar sem a.m.k. 25% lögaðilans er í eigu einstaklings sem telst nýliði.

3. gr.

Handhafar greiðslna

Greiðslur samkvæmt reglugerð þessari fá framleiðendur einir sem uppfylla eftirtalin skilyrði:

- a. skráðir eigendur eða leigjendur lögbýlis og
- b. stunda nautgriparækt og reka nautgripabú á lögbýlinu með virkt virðisaukaskattsnúmer og starfsemi þeirra fellur undir atvinnugreinanúmer 01 og 02 í atvinnuvegaflokkun Hagstofu Íslands, sbr. ÍSAT2008, þó ekki starfsemi í undirflokkum 01.61, 01.62, 01.63, 01.64, 01.70 og 02.40.

Hjón og einstaklingar í óvígðri sambúð, samkvæmt skráningu í Þjóðskrá, sem standa saman að búrekstri geta óskað eftir því við Matvælastofnun að greiðslur samkvæmt reglugerð þessari sé skipt jafnt á milli aðila. Þegar um fleiri sjálfstæða rekstraraðila er að ræða með aðskilinn búrekstur getur hver og einn þeirra verið handhafi greiðslna.

Skilyrði fyrir greiðslum eru:

- a) þátttaka í afurðaskýrsluhaldi Bændasamtaka Íslands með fullnægjandi skilum í samræmi við 4. gr. og
- b) fullnægjandi skil á haustskýrslu í Bústofn skv. 10. gr. laga nr. 38/2013 um búfjárhald.

Hver framleiðandi getur ekki fengið framlög samkvæmt reglugerð þessari sem nema herra hlutfalli en 0,7% af árlegum heildarframlögum samkvæmt samningi um starfsskilyrði nautgriparæktar.

4. gr.

Afurðaskýrsluhald

Til að þátttaka í afurðaskýrsluhaldi í nautgriparækt sé metin fullnægjandi skulu skilyrði sem tilgreind eru í þessari grein vera uppfyllt, en miðað er við að unnt sé að rekja uppruna og afdrif allra gripa í hjörðinni á einfaldan og öruggan hátt, sem og safna áreiðanlegum upplýsingum um afurðir búins.

Standa þarf að fullnægjandi skilum á hjarðbók og heilsukorti og tryggja rétta framkvæmd á merkingum nautgripa, í samræmi við reglugerð um merkingar búfjár nr. 916/2012 með síðari breytingum.

Allur nautgripabústofn framleiðanda skal skráður í Huppu. Framleiðandi ber ábyrgð á skráningu á afurðum, magn og gæði mjólkur og kjöts, sem gripir búins gefa af sér.

Eftirfarandi skal skrá eða vera til staðar auk upplýsinga sem eru skráðar í hjarðbók búins (lágmarkskröfur):

1. Fangafdrif allra kúa.
2. Burðardagsetning kúa, fjöldi fæddra kálfa og afdrif þeirra.
3. Fallþunga allra sláturgripa, sem byggir á innlesnum sláturgögnum frá sláturhúsum.
4. Ástæðu afsetningar kúa og kvígna og fylgja tímamörkum um skráningar sem tilgreind eru í reglugerð nr. 916/2012 um merkingar búfjár.
5. Nyt allra mjólkandi kúa (mjólkurskýrsla) í hverjum mánuði fyrir 11. næsta mánaðar eftir mælingarmánuð.
6. Mjólkurframleiðendur skulu taka kýrsýni úr öllum mjólkandi kúm tvisvar sinnum í hverjum ársfjórðungi og þarf niðurstaða þeirra að hafa borist innan 15 daga frá lokum sýnatökumánaðar.

Framleiðendur skulu staðfesta skýrsluhaldsupplýsingar í síðasta lagi 10. hvers mánaðar fyrir næstliðinn mánuð og á það jafnt við um mjólkurframleiðendur sem og þá sem eingöngu stunda kjötframleiðslu.

Matvælastofnun skal tryggður fullnægjandi aðgangur að Huppu og undirliggjandi gagnagrunni til að tryggja m.a. að skýrsluhaldskerfið uppfylli þær kröfur sem gerðar eru til fullnægjandi afurðaskýrsluhalds.

5 gr.

Opinbert eftirlit

Ráðherra fer með yfirstjórn mála samkvæmt reglugerð þessari. Matvælastofnun fer með framkvæmd reglugerðarinnar og hefur eftirlit með að ákvæðum hennar sé fylgt.

6. gr.

Framkvæmdanefnd búvörusamninga

Framkvæmdanefnd búvörusamninga er samráðsvettvangur samningsaðila samnings um starfsskilyrði nautgriparæktar.

Framkvæmdanefnd búvörusamninga aflar upplýsinga um þróun framleiðslu og sölu á nautgripaaufurðum, afurðaverð, inn- og útflutning nautgripaafurða, afkomuþróun í nautgriparækt auk annarra upplýsinga sem hafa þýðingu fyrir framkvæmd samnings um starfsskilyrði nautgriparæktar.

Á grundvelli upplýsinga skv. 2. mgr. getur framkvæmdanefnd búvörusamninga ákveðið að færa fjármuni á milli einstakra verkefna sem falla undir samning um starfsskilyrði nautgriparæktar sbr. töflu í viðauka I við samninginn. Heimilt er að færa árlega allt að 20% þeirrar fjárhæðar sem ætlaðar eru til hvers verkefnis.

Nefndin skal tilkynna Matvælastofnun um tilfærslur sem taka eiga gildi um áramót eigi síðar en 1. desember árið á undan.

Framkvæmdanefnd búvörusamninga tekur ákvörðun um skerðingu framlaga ef ekki verður jöfnuður milli innlausnar og sölu greiðslumarks skv. 8. gr. og 9. gr.

Framkvæmdanefnd búvörusamninga gerir tillögur um ráðstöfun framlaga sem ætluð eru til framleiðslujafnvægis skv. 6. gr. samnings um starfsskilyrði nautgripæræktar. Nefndinni er heimilt að ráðstafa slíkum fjármunum til eftirtalinna verkefna:

- a. Efling á markaðsfærslu nautgripaafurða.
- b. Sérstakar uppbætur fyrir slátrun kálfa og kúa.
- c. Tilfærsla í aðra framleiðslu á kúabúum.
- d. Tímabundnar býlisgreiðslur óháðar framleiðslu.

Matvælastofnun skal ráðstafa framlögum samkvæmt ákvörðun framkvæmdanefndar búvörusamninga.

II. kafli **Greiðslumark**

7 gr.

Heildargreiðslumark og greiðslumark lögbýla

Heildargreiðslumark til framleiðslu mjólkur verðlagsárið 2017 skal vera xxx milljónir lítra og skiptist í greiðslumark lögbýla. Greiðslumark lögbýla reiknast í lítrum mjólkur og skiptist hlutfallslega milli lögbýla á sama hátt og greiðslumark til framleiðslu mjólkur á framleiðsluárinu 1. janúar til 31. desember 2016.

8. gr.

Innlausn greiðslumarks

Matvælastofnun annast innlausn greiðslumarks. Handhafi greiðslumarks getur lagt fram beiðni um innlausn á ónýttu greiðslumarki sínu á þar til gerðu eyðublaði sem Matvælastofnun útvegar. Með beiðni um innlausn á greiðslumarki skal fylgja staðfesting um eignarhald á lögbýli og samþykki ábúanda, sameigenda og veðhafa í lögbýlinu.

Innlausn greiðslumarks skal fara fram 1. apríl, 1. september og 1. nóvember ár hvert. Framkvæmd innlausnar fer fram með eftirfarandi hætti:

Matvælastofnun auglýsir			
Innlausnardagur:	innlausnarvirði eigi síðar en:	Skilafrestur vegna beiðni um innlausn:	Greiðslufrestur Matvælastofnunar:
1. apríl	15. janúar	4. mars	15. apríl
1. september	15. janúar	4. ágúst	15. september
1. nóvember	15. janúar	4. október	15. nóvember

Greiðslumark framleiðanda þar sem engin framleiðsla fer fram í a.m.k. heilt verðlagsár skal ríkið innleysa á fyrsta innlausnardegi hvers árs, án þess að bætur komi fyrir.

Fyrir innleyst greiðslumark greiðir ríkissjóður tvöfalt núvirt andvirði greiðslna út á greiðslumark út gildistíma samnings um starfsskilyrði nautgripæræktar dags. 19. febrúar 2016. Núvirt andvirði greiðslna skal reiknast miðað við stýrivexti Seðlabanka Íslands 1. janúar ár hvert og greiðslur frá þeim tíma. Innlausnarvirði greiðslumarks helst óbreytt frá auglýsingardegi innlausnarvirðis til 31. desember ár hvert.

9. gr.

Sala á innleystu greiðslumarki

Matvælastofnun skal bjóða til sölu það greiðslumark, sem er innleyst, á því verði sem ríkið greiddi fyrir innlausn skv. 4. mgr. 8. gr. Það sem Matvælastofnun innleysti án þess að bætur komu fyrir skv. 3. mgr. 8. gr. skal boðið til sölu á innlausnarvirði skv. 4. mgr. 8. gr.

Framkvæmd vegna sölu á innleystu greiðslumarki fer fram með eftirfarandi hætti:

Kaupandi er skráður fyrir greiðslumarki frá:	Kaupandi nýtir greiðslumark á kaupári frá og með:	Innlausnarvirði skal auglýst eigi síðar en:	Skilafrestur umsóknar um kaup á greiðslumarki:	Greiðslufrestur vegna kaupa á greiðslumarki:
1. apríl	1. janúar	15. janúar	4. mars	20. mars
1. september	1. janúar	15. janúar	4. ágúst	20. ágúst
1. nóvember	1. janúar	15. janúar	4. október	20. október

Framleiðendur sem teljast nýliðar eða hafa framleitt a.m.k. 10% umfram greiðslumark á árunum 2013-2015 skulu hafa forgang að kaupum 50% þess greiðslumarks sem hefur verið innleyst. Það skiptist jafnt á milli forgangshópanna sem skiptist svo hlutfallslega í samræmi við þann lítrafjölda sem þeir óskuðu eftir að kaupa.

Það greiðslumark sem þá er eftir skal boðið öðrum kaupendum sem og kaupendum í 3. mgr., að frádregnu því magni sem þeir keyptu skv. 3. mgr., hlutfallslega í samræmi við þann lítrafjölda sem þeir óskuðu eftir að kaupa.

Seljst innleyst greiðslumark ekki þannig að ekki verði jöfnuður á innlausn og sölu greiðslumarks skal því mætt með skerðingu milli verkefna samkvæmt ákvörðun framkvæmdanefndar búvörusamninga skv. 6. gr. Ef hins vegar er um umframeftirspurn að ræða skal innleystu greiðslumarki skipt milli kaupenda hlutfallslega í samræmi við þann lítrafjölda sem þeir óskuðu eftir.

10. gr.

Nýting greiðslumarks

Afurðastöð skal greiða framleiðanda lágmarksverð fyrir mjólk sem miðast við 1. flokks mjólk með skilgreindu efnainnihaldi. Fyrir aðra mjólk sem ekki stenst kröfur sem 1. flokks mjólk greiðir afurðastöð verð allt niður að leyfilegum afföllum frá verði 1. flokks mjólkur.

Framleiðsla umfram greiðslumark skal fara á erlendan markað á ábyrgð hvers framleiðanda og viðkomandi afurðastöðvar. Framkvæmdanefnd búvörusamninga getur þó gefið skriflega heimild til sölu þessara vara innanlands ef heildarframleiðsla verður minni en sala og birgðastaða gefa tilefni til.

Öll mjólk sem seld er í afurðastöð frá viðkomandi lögbýli skal reiknast með í uppgjöri greiðslumarks fyrir lögbýlið.

Mjólk sem unnið er úr til sölu á sama lögbýli og framleiðsla fer fram telst til framleiðslu innan greiðslumarks.

Matvælastofnun safnar skýrslum um framleiðsluna.

11. gr.

Greiðsla út á greiðslumark

Greiðsla út á greiðslumark er framlag úr ríkissjóði til framleiðenda mjólkur og greiðist mánaðarlega úr ríkissjóði til handhafa greiðslumarks, sbr. 55. gr. laga nr. 99/1993. Handhafi greiðslumarks fær greiddar 1. hvers mánaðar 1/12 hluta greiðslna út á greiðslumark óháð framleiðslu, að því tilskyldu að framleiðsla lögbýlisins sé a.m.k. xx% greiðslumarks á gildistíma reglugerðarinnar.

Greiðslur afurðastöðvar vegna framleiðslu umfram greiðslumark, fyrir ónýtt greiðslumark, skulu ganga hlutfallslega til annarra greiðslumarkshafa. Skal fyrst greitt fyrir fyrsta prósentustig sem greiðslumarkshafi framleiðir umfram eigið greiðslumark og síðan annað prósentustig og svo áfram eftir því sem ónotað greiðslumark gefur tilefni til.

12. gr.

Uppgjör greiðslna

Sjái handhafi greiðslna út á greiðslumark fram á að nýting greiðslumarks gefi ekki rétt til 100% af greiðslum framleiðslutímabilsins, ber honum að tilkynna það Matvælastofnun, sem þá skal haga greiðslum í samræmi við áætlaða nýtingu.

Afurðastöð skal senda Matvælastofnun tilkynningu um stöðvun mjólkurinnleggs, ef mjólkurinnlegg framleiðanda fellur niður í heilan mánuð eða lengri tíma.

13. gr.

Útreikningur á greiðslumarki lögbýla

Matvælastofnun reiknar út greiðslumark til framleiðslu mjólkur, heldur skrá yfir greiðslumark lögbýla og rétt til greiðslu samkvæmt því og lætur afurðastöðvum og búnaðarsamböndum í té eintak af henni fyrir starfssvæði þeirra. Matvælastofnun aflar upplýsinga og annast útreikninga vegna framkvæmdar þessarar reglugerðar og hefur eftirlit með uppgjöri afurðastöðva við framleiðendur. Afurðastöðvum og framleiðendum er skylt að láta Matvælastofnun í té allar þær upplýsingar sem að gagni geta komið við störf Matvælastofnunar og þær geta veitt.

14. gr.

Tilkynningar um greiðslumark lögbýla

Matvælastofnun skal tilkynna framleiðendum um greiðslumark lögbýla. Framleiðendur eiga þess kost að koma á framfæri athugasemdum og skulu þær berast Matvælastofnun innan 20 daga frá dagsetningu tilkynningar um greiðslumark, ella gildir það fyrir framleiðslutímabilið. Matvælastofnun endurskoðar útreikninga, sem athugasemdir eru gerðar við og tilkynnir framleiðanda niðurstöðu sína. Berist Matvælastofnun ekki athugasemdir við þá niðurstöðu innan 25 daga frá dagsetningu endurútreikningsins gildir hann fyrir hlutaðeigandi framleiðslutímabil. Uni viðkomandi framleiðandi ekki þeirri niðurstöðu, hefur hann rétt til að skjóta ágreiningnum með rökstuddri kærui til ráðherra, sbr. 24. gr.

III. kafli

Innvegin mjólk

15. gr.

Greiðslur út á innvegna mjólk

Greiðslur á innvegna mjólk eru greiddar mánaðarlega á alla innvegna mjólk óháð greiðslumarki. Heildarupphæð árlegs stuðnings skiptist í 12 jafna hluta þannig að jafnhá upphæð er greidd í hverjum mánuði óháð framleiðslumagni. Upphæðin í hverjum mánuði deilist jafnt á alla innvegna lítra í þeim mánuði. Greiða skal 1. hvers mánaðar fyrir innlegg næstsíðasta mánaðar, í fyrsta sinn 1. mars 2017.

IV. kafli
Gripagreiðslur

16. gr.

Fjárhæð til einstakra framleiðenda

Hlutdeild hvers framleiðanda í heildarframlagi til gripagreiðslna á hverju verðlagsári fer eftir fjölda árskúa samkvæmt afurðaskýrsluhaldi hans. Við ákvörðun á fjölda árskúa skal fyrsta viðmiðunartímabilið vera 1. október 2015 til 30. nóvember 2016. Síðan skal fjöldi árskúa sóttur mánaðarlega úr afurðaskýrsluhaldinu og breytingar á gripagreiðslum taka gildi tveimur mánuðum eftir það.

Heildargripagreiðslur verða eins og sýnt er í töflu hér að neðan, og skiptast þær í tvo flokka, mjólkurkúr og holdakúr. Árlega verður greiðslum sem til ráðstöfunar eru í hvorum flokki deilt á allar árskúr í viðkomandi flokki.

<i>Mjólkurkúr (Árskúr)</i>	<i>Hlutfall af óskertri greiðslu</i>
1 - 50	100%
51 - 100	75%
101 - 140	50%
141 - 180	25%
>180	0%

Gripagreiðslur skerðast ef fjöldi holdakúa framleiðanda á lögbýli er yfir þeim mörkum sem að neðan greinir, samkvæmt eftirfarandi töflu:

<i>Holdakúr (Árskúr)</i>	<i>Hlutfall af óskertri greiðslu</i>
1 - 200	100%
201 - 220	75%
221 - 240	50%
241 - 260	25%
>260	0%

Ef heildarfjöldi árskúa á landinu er minni en sú viðmiðun sem stuðst var við í samningi skv. 1. gr., þ.e. 25.000 mjólkurkúr og 3.000 holdakúr, hækkar greiðsla ríkissjóðs á hverja árskú til samræmis.

Við ákvörðun á fjölda árskúa hvers framleiðanda skal Matvælastofnun bera saman upplýsingar sem skráðar eru í afurðaskýrsluhaldið við upplýsingar um fjölda búfjár sem stofnunin aflar samkvæmt lögum um búfjárhald nr. 38/2013.

17. gr.

Gjalddagar gripagreiðslna

Gripagreiðsla er greidd í upphafi hvers mánaðar.

V. kafli
Kynbótastarf

18. gr.

Ráðstöfun greiðslna vegna kynbótastarfs

Greiðslum vegna kynbótastarfs skal Matvælastofnun ráðstafa með eftirfarandi hætti:

1. 85% árlegra framlaga skal ráðstafa til aðila sem reka starfsemi í nautgripasæðingum. Framlagið skal greitt með 12 jöfnum mánaðarlegum greiðslum og skiptist milli viðtakenda á grundvelli magns innveginna mjólkur á starfssvæði viðtakenda í næstliðnum mánuði. Þannig er framlagi vegna janúar skipt á grundvelli framleiðslu í næstliðnum desembermánuði.

2. 15% árlegra framlaga skal ráðstafa til jöfnunar á sæðingakostnaði til aðila sem reka starfsemi í nautgripasæðingum. Framlagið skal greitt með 12 jöfnum mánaðarlegum greiðslum og skiptist milli aðila með eftirfarandi hætti:
 - a. 65% fjárhæðarinnar skiptist samkvæmt fjölda stöðugilda frjótækna sem starfa fyrir hvern aðila.
 - b. 20% fjárhæðarinnar skiptist samkvæmt heildarfjölda ekinna kílómetra pr. sæðingu á starfssvæði hvers aðila. Ekki er þó greitt fyrir fyrstu 20 kílómetra sem eknir eru vegna hvernar sæðingar.
 - c. 10% fjárhæðarinnar skiptist samkvæmt fjölda sæðinga á starfssvæði hvers aðila.
 - d. 5% fjárhæðarinnar renna til Nautastöðvar Bændasamtaka Íslands til að standa straum af kostnaði við þjálfun frjótækna.

Heimilt er að ráðstafa allt að 3% árlegrar fjárveitingar til að styrkja mikilvæg sameiginleg verkefni í kynbótastarfinu, s.s. kvíguskoðun o.fl. Framkvæmdanefnd búvörusamninga tekur ákvörðun um nýtingu heimildarinnar og skal ákvörðun tekin fyrir lok janúar ár hvert vegna yfirstandandi árs.

VI. kafli

Nautakjötsframleiðsla

19. gr.

Einangrunarstöð og sláturálag

Matvælastofnun skal samkvæmt tillögu framkvæmdanefndar búvörusamninga skv. 6. gr. ráðstafa framlögum til stuðnings við nautakjötsframleiðslu til eftirtalinna verkefna:

1. Einangrunarstöðvar vegna innflutnings á erfðaeftirfarandi holdanautgripa.
2. Sláturálag á nautakjöt sem uppfyllir eftirfarandi gæðakröfur.
 - a. Lágmarksþyngd grips sé 250 kg.
 - b. Nautakjöt falli ekki í EUROP gæðaflokk P og P-.
 - c. Gripur sé yngri en 30 mánaða.

Fjárhæð sem ráðstafað er til að greiða sláturálag á nautakjöt skiptist jafnt á þá skrokka sem fullnægja gæðakröfum skv. 2. tl. 1. mgr. Matvælastofnun skal greiða það til framleiðenda fjórum sinnum á ári.

VII. kafli

Fjárfestingastuðningur

20. gr.

Auglýsing og umsókn

Matvælastofnun annast umsýslu vegna fjárfestingarstuðnings. Á hvert auglýsir Matvælastofnun, t.d. í Bændablaðinu, eftir umsækjendum um framlög til fjárfestingastuðnings. Umsókn skal fylgja vönduð framkvæmda- og kostnaðaráætlun sem Matvælastofnun telur fullnægjandi. Sé um byggingu að ræða skulu fylgja teikningar ásamt byggingarleyfi viðkomandi sveitarfélags.

Framleiðandi í nautgriparækt sem uppfyllir skilyrði 3. gr. getur sótt um fjárfestingarstuðning. Umsóknnum skal skila inn í rafrænt umsóknarkerfi Matvælastofnunar, eigi síðar en 31. mars ár hvert vegna framkvæmda á árinu.

Í umsókn skulu eftirfarandi upplýsingar koma fram:

1. Upplýsingar um nafn, kennitölu, og lögheimili framleiðanda sem sækir um stuðning.
2. Upplýsingar um búsnúmer lögbýlis sem sótt er um fjárfestingarstuðnings fyrir.
3. Tegund fjárfestingar sem óskað er stuðnings við:
 - a. Nýframkvæmdir.

- b. Endurbætur á eldri byggingum.
- 4. Heildarkostnaður vegna fjárfestingar.
- 5. Rökstuðningur fyrir framkvæmd og hvernig framkvæmdin uppfyllir skilyrði fyrir stuðningi skv. 21. gr.
- 6. Upplýsingar um þegar greiddan fjárfestingarstuðning vegna sömu fjárfestingar, ef við á.

Fylgiskjöl með umsókn:

- a. Framkvæmdaáætlun með verklýsingu og tímasettri verkáætlun.
- b. Sundurliðuð kostnaðaráætlun.
- c. Byggingarleyfi, ef við á.
- d. Leyfi þinglýstra eigenda jarðar fyrir framkvæmd.

21. gr.

Skilyrði stuðnings

Fjárfestingastuðningur er veittur vegna framkvæmda sem stuðla að hagkvæmari búskaparháttum, bættum aðbúnaði nautgripa og aukinni umhverfisvernd.

Stuðningur er veittur vegna eftirfarandi framkvæmda:

- a. Nýframkvæmda.
- b. Endurbætur á eldri byggingum.

Umsækjendur skulu skila fullnægjandi umsókn innan tilskilins tímafrests sbr. 20. gr. Matvælastofnun skal fyrir 15. maí ljúka yfirferð umsókna og leggja mat á hvort þær uppfylli skilyrði fyrir stuðningi. Matvælastofnun tilkynnir umsækjendum um niðurstöðu matsins.

22. gr.

Afgreiðsla og útreikningur fjárfestingastuðnings

Matvælastofnun annast úthlutun fjárfestingastuðnings. Fjárfestingastuðningur fyrir hvern framleiðanda getur að hámarki numið 40% af stofnkostnaði ef heildarkostnaður fer yfir eina milljón króna. Hver framleiðandi getur þó ekki fengið hærra framlag árlega en 10% af heildarframlögum stuðningsins samkvæmt fjárlögum.

Sé fyrirhugað að framkvæmdir sem sótt er um stuðning fyrir verði framkvæmdar á fleiri en einu ári skal umsækjandi gera grein fyrir áfangaskiptingu við framkvæmdirnar í heild sinni í verklýsingu, verk- og kostnaðaráætlun. Heimilt er að veita stuðning við sömu framkvæmdir til allt að þriggja ára. Framleiðandi sem fengið hefur hámarksfjárfestingastuðning þrjú ár í röð sbr. ofangreint getur ekki sótt um stuðning að nýju fyrir en liðin eru tvö ár frá síðustu styrkveitingu.

Við upphaf framkvæmdar sem telst styrkhæf greiðist 50% af samþykktri styrkupphæð og 50% í framhaldi af skilum á lokaskýrslu að teknu tilliti til skilyrða í 23. gr. Matvælastofnun er heimilt að óska eftir afriti af reikningum vegna framkvæmda sem nutu fjárfestingastuðnings.

Framlög skerðast hlutfallslega á allar samþykktarumsóknir ef fjármunir hrökkva ekki til.

23. gr.

Eftirlit og úttektir

Matvælastofnun hefur eftirlit með því að stuðningur sem veittur hefur verið hafi verið notaður til þeirra fjárfestinga sem getið er um í umsókn skv. 20. gr.

Matvælastofnun getur framkvæmt úttekt á framkvæmd umsækjanda telji hún þess þörf. Ef Matvælastofnun telur að framkvæmdakostnaður eða einstaka kostnaðarliðir hafi farið fram úr því sem eðlilegt getur talist skal taka tillit til þess við útreikning á endanlegri styrkuppþæð. Matvælastofnun skal upplýsa umsækjanda um allar slíkar breytingar og gefa honum hæfilegan frest til andmæla.

Komi í ljós að stuðningur sem greiddur hefur verið hafi ekki verið nýttur til framkvæmda á framkvæmdaári sem sótt var um stuðning fyrir eða vikið hafi verið frá upplýsingum samkvæmt umsókn, skal framleiðandi endurgreiða greiddan stuðning.

VIII. kafli

Gildistaka og fleira

24. gr.

Kæruheimild

Ákvörðun Matvælastofnunar um skráningu á greiðslumarki lögbýla og um rétt til beinna greiðslna er heimilt að skjóta til úrskurðar ráðherra innan þriggja mánaða, sbr. VII. kafla stjórnsýslulaga.

25. gr.

Endurgreiðsla ofgreiddra greiðslna

Ef greiðslur samkvæmt reglugerð þessari hafa verið ofgreiddar ber handhafa greiðslna að endurgreiða ríkinu hið ofgreidda fé.

26. gr.

Skerðing og niðurfelling greiðslna

Matvælastofnun er heimilt að skerða eða fella niður stuðningsgreiðslur ef framleiðandi í nautgriparækt gefur vísvitandi rangar upplýsingar eða brýtur á annan hátt skilyrði í reglugerð þessari.

27. gr.

Viðurlög

Brot á reglugerð þessari varða viðurlögum samkvæmt búvörulögum nr. 99/1993, með síðari breytingum. Með mál út af brotum skal farið skv. lögum nr. 88/2008 um meðferð sakamála.

28. gr.

Gildistaka

Reglugerð þessi er sett samkvæmt heimild í búvörulögum nr. 99/1993, með síðari breytingum.

Reglugerðin öðlast gildi frá og með 1. janúar 2017 og gildir til 31. desember 2017. Við gildistöku þessarar reglugerðar fellur úr gildi reglugerð nr. 1220/2015 um greiðslumark mjólkur á lögbýlum og greiðslur til bænda verðlagsárið 2016, reglugerð nr. 567/2006 um gripagreiðslur á lögbýlum og reglugerð nr. 190/2011 um markaðsfyrirkomulag við aðilaskipti að greiðslumarki mjólkur á lögbýlum, með síðari breytingum.

Ákvæði til bráðabirgða

Þrátt fyrir 28. gr. skal uppgjör vegna ársins 2016 fara fram í samræmi við ákvæði reglugerðar nr. 1220/2015 um greiðslumark mjólkur og lögbýlum og greiðslur til bænda verðlagsárið 2016.

Atvinnuvega- og nýsköpunarráðuneytinu, x.xxx.2016.

F. h. sjávarútvegs- og landbúnaðarráðherra,

Ólafur Friðriksson.

Rebekka Hilmarsdóttir.